

每週經課朗誦經文(巴克禮台語漢字)2013/06/02

共同經課 - 1 列王記上十八章二十節~三十九節

20 亞哈就差人去以色列眾人處，招集諸個先知到迦密山。21 以利亞就近眾百姓講：「恁存二樣心無決斷欲到甚麼時啊？若耶和華是上帝，就著趁耶和華；若巴力是上帝就著趁巴力。」百姓無應一句話。22 以利亞給百姓講：「耶和華的先知只有剩我一人；總是巴力的先知有四百五十人。23 今著用二隻牛犛仔互阮，巴力的先知通為家己揀一隻牛仔，切歸塊，下佇柴頂，下面毋通橐火；我料理彼隻牛仔，下佇柴頂，下面也無橐火。24 恁求叫恁的上帝的名，我求叫耶和華的名。彼個用火顯應的上帝，就是上帝。」眾百姓應講：「此個話真好。」25 以利亞對巴力的先知講：「恁為家己揀一隻牛犛仔，代先料理伊，因為恁人額卡多，恁求叫恁上帝的名，獨獨毋通橐火佇下面。」26 in就將所互in的牛犛仔去料理伊，對早起到日晝，求叫巴力的名講：「巴力啊，著聽阮！」總是無聲說，也無應答。in佇所起的壇周圍越跳。27 到中晝，以利亞譏刺in，講：「大聲求叫啦！因為伊是上帝，伊豈採靜靜的想，抑是退去偏僻的所在，抑是行路，抑是啲暈，恁著叫伊醒。」28 in大聲求叫，照in的例，用刀用槍家己割，致到in的身軀流血。29 對日過晝到獻下昏祭的時，in啲講in的先知話；總是無聲說，無應答也無插in的。30 以利亞給眾百姓講：「恁來近倚我。」眾百姓就近倚伊。伊就閣修理耶和華倒壞的壇。31 以利亞取十二塊石，照雅各的子的支派的數額（此個雅各就是前耶和華的話曾臨到伊講：「以色列欲做你的名者」），32 以利亞用諸個石頭，奉耶和華的名起一座壇，佇壇的周圍開溝，會貯得種子二細亞，33 閣排列柴，將牛仔切歸塊下佇柴頂，講：「恁用四個桶貯水滿滿，傾佇燒祭及柴的頂面」；34 閣講：「傾第二擺。」in就傾第二擺；閣講：「傾第三擺。」in就傾第三擺。35 水流佇壇的四圍，溝也有水滿滿。36 到獻下昏祭的時，先知以利亞近前來，講：「亞伯拉罕、以撒、以色列的上帝，耶和華啊，求你今仔日互人知你佇以色列做上帝，也知我是你的奴僕，閣是照你的話來行這一切的事。37 耶和華啊，著聽我，著聽我！互此國的百姓知你——耶和華就是上帝，你互in的心越倒轉。」38 耶和華的火就降落，一盡燒伊的燒祭、及柴、及石、及土，閣燒乾溝內的水。39 眾百姓看見，就仆佇地裡，講：「耶和華伊是上帝！耶和華伊是上帝！」

共同經課 - 2 詩篇九十六篇

1 恁著向耶和華唱新的歌！全地攏著向耶和華唱歌！2 著向耶和華唱歌，祝謝伊的名！日日傳報伊的救恩！3 佇列邦的中間講起伊的榮光！佇萬百姓的中間講起伊奇妙的所做！4 因為耶和華做大，應該受極大的謳嘍；伊佇眾神明的頂面，應該受敬畏。5 因為列邦的上帝攏是虛假；獨獨耶和華創造諸個天。6 佇伊的面前有尊貴及威嚴；佇伊的聖所有權能及榮光。7 百姓中的逐族啊，恁著將權能榮光，歸互耶和華，歸互耶和華！8 用伊的名所應該得著的榮光歸互耶和華，帶禮物來入伊的院。9 著用聖潔的妝飾敬拜耶和華；全地佇伊的面前愕愕！10 佇列邦中著講：耶和華做王！世界堅固，袂搖動；伊欲照公平審判萬百姓。11 願天歡喜，地快樂！願海及其中所充滿的攏出大聲！12 願田園及其中所有的攏快樂！彼時，樹林內的樹木攏欲佇耶和華的面前出歡喜的聲。13 因為伊來啦，伊來欲審判全地。伊欲照公義審判世界，照伊的信實審判萬百姓。

共同經課 - 3 加拉太書一章一節~十二節

1 保羅做使徒（毋是出佇人，也毋是對人，就是對耶穌基督，及互伊對死人中復活的父上帝）2 今及同佇啲的眾兄弟，批寄互加拉太諸個教會。3 願恁對父上帝及咱的主耶穌基督得著恩典、平安！4 伊為著咱的罪獻家己，欲救咱出現今夕的世代，就是照咱的父上帝的旨意。5 願榮光歸伊到代代。阿們！6 前佇基督的恩召恁的，恁離開伊到即緊，去趁別樣的福音，是我所奇怪。7 彼個別個毋是福音，不過有人攪擾恁，愛拍亂基督的福音若定。8 今設使阮，抑是對天來的天使，傳福音互恁，各樣佇阮所曾傳互恁的，伊著受咒詛。9 親像阮前曾講的，今我閣講伊，若有人傳福音互恁，各樣佇恁所曾受的，伊著受咒詛。10 我今是啲對人諂媚嗎？抑是對上帝啊？抑是我啲求互人歡喜啊？我若猶久愛互人歡喜，就毋是基督的奴僕。11 兄弟啊，我報恁知，論我平素所傳的福音彼個毋是照人的意思。12 因為我未曾對人受著，也無受人教示，是對耶穌基督的啟示。

共同經課 - 4 路加福音七章一節~十節

1 耶穌講互百姓聽的話攏明白，就入迦百農。2 有一個百總所對重的奴僕患著病，啲欲死。3 百總聽見耶穌的事，就差猶太的長老幾若人求伊來救伊的奴僕。4 in就近耶穌，切切求伊講：「此人會堪得你給伊行此個代誌；5 因為伊疼咱的百姓，閣本身替咱起會堂。」6 耶穌及in去。離厝無偌遠，百總差幾若個朋友就近伊，給伊講：「主啊！毋通勞煩；你到我的厝，我當袂起。7 我也掠做家己袂堪得就近你，你若講一句話，我的奴僕就會好。8 因為我也是互人管的人，也有兵互我管，給此個講：『去！』伊就去；給彼個講：『來！』伊就來；給我的奴僕講：『行按呢！』伊就行按呢。」9 耶穌聽見諸個話，就奇怪伊，越轉身給隨伊的眾人講：「我給恁講，親像此號的信，連以色列中我猶未曾抵著。」10 所差的人倒去到厝，看見奴僕已經好好。